

Joel ayvu oĩa Joel ayvu oĩa

Judá yvy re tuku-karu ou vy nhuũ ha'e ojou va'e tema ho'upa, yakã voi omombirupa ramo mymba kuery omanomba yuvei gui. Profeta Joel oikuua rã ha'e rami ae 'rã oiko araka'eve rã Nhanderuete ojejavy rei va'e kuery ombopaga ramo. Ha'e va'e ára pe ma “Senhor ára” he'i. “Ha'e va'e ára ma ha'e rami ete 'rã! Mba'eta ovaẽ rai'i ma Senhor ára. Mba'emo mbovaipaa rami 'rã ou Ipo'akapa va'e gui” (1.15). “Ha'e va'e ára ma pytãmba 'rã, arai huãmba rei 'rã. Yvyty áry ko'ẽ jekuua ouvya rami avi ou 'rã peteĩ regua heta ha'e imbaraete ete va'e. Ha'e ramigua ma yma guive oiko e'ŷ va'ekue teri, neĩ ha'e va'e rire voi ndoikovei 'rã, ikuai jevy-jevy va'e pe voi. Ha'e kuery renonde oo oiny tata nhomombaarã, ha'e rã hakykue ma tataendy joapy va'e ou. Henonde ma Éden yvotyty rami yvy itui, ha'e rã hakykue ma yvy mbovaipaa. Avave rei ndoo jepeai 'rã” (2.2-3).

Senhor aipoe'i avi: “Araka'eve rã avakue ha'e javi re anhoẽ 'rã imbouvy Xenhe'ẽ. ... Yva ha'e yvy re aexa uka 'rã nhomondyipaarã: tuguy, tata ha'e hataxí. Senhor ára opa mba'e py nda'evei va'e ou ra ramo kuaray pytãmba 'rã, ha'e rã jaxy ma tuguy rami 'rã ojekuua. Ha'e ramo ha'e javi Senhor rery rupi ojapukai va'e oo jepe 'rã” (2.28a, 30-31a).

Tuku-karu ha'e nda'okyveia pukukue gui ikuai axypaa re ijayvuague

¹ Ayvu SENHOR guigua Petuel ra'y Joel pe ombou va'ekue.

² Peẽ tujakue, pendu pova'e. Nhandeyvy re pendekuai va'e, pejapyxaka pavẽ. Oiko ma pa ha'e ramigua pendekuai jave? Tyrã pa penderu kuery ikuai jave oiko?

³ Pemombe'u ha'e nunga pendera'y kuery pe, ha'e pendera'y kuery ju tomombe'u gua'y kuery pe, ha'e gui ta'y kuery jevy pe guive.

⁴ Mba'eta tuku mba'emo ayaa ndo'upai va'ekue ma tuku oguata va'e ho'u, ha'e tuku oguata va'e ndo'upai va'ekue ma tuku mba'emo 'ua ho'u, ha'e gui tuku mba'emo 'ua ndo'upai va'ekue ma tuku mba'emo mbovaipaa ho'u.*

⁵ Peka'u rei va'e, pemyĩ ke, ha'e pejae'o. Vinho pey'u peikovy va'e ha'e javi penhendu ratã vinho pyau káuxa, mba'eta pendejuru pyguarã va'ekue oipe'aa.

⁶ Mba'eta xeyvy rovai guarã ou oiny peteĩ regua imbaraketue mbovy e'ŷ va'e. Haĩ ma guary raĩ rami, guary kunha rami ete haĩ apĩ va'e.†

⁷ Xeyvy re ha'e kuery ombovaipa uva rembypy onhotŷ mbyre, figo'y guive omomba. Oipiropa vy ipirekue rive omombo yvy re, rire hakã ha'e javi ma ojepiropa rei va'e opyta.

⁸ Pejae'o ke kunhataĩ'i voxā vaikue py onhemonde reve omerã va'ekue kunumi re ipy'a vai va'e rami.

⁹ Ha'e gui SENHOR pegua oo py nda'ipovei mba'emo aju ha'e mba'emo rykue peme'ẽ 'rã va'ekue, rire SENHOR rembiguai sacerdote kuery voi iporiaupa rei okuapy.

¹⁰ Mba'ety ikuai va'e ivaipa, yvy ipirupa oiny guive, mba'emo aju ivaipa, uva rembypy ipirupa, ha'e oliveira'a hu'ũmba.

* ^{1:4} Apy ijayvu irundy regua tuku ha'e py ikuai va'e re. Ha'e nunga ombovaipa ha'e kuery yvy, ho'upa mba'emo rogue, uva rogue, ha'e yvyra pire guive. Nhanderuete ombou ojejavya re, raka'eve rã SENHOR ára py mba'emo vai ombou va'erã rami avi. † ^{1:6} "Guary rami haĩ va'e" he'ia ma tuku-karu re ijayvu vy, mba'emo 'ua ramo.

¹¹ Mba'ety rupi peiko va'e, peximba ke. Ha'e uva re pepena va'e, penhendu ratā, trigo ha'e cevada re guive, mba'eta okanhymba ma pemono'õ 'rā va'ekue.

¹² Uva rembypy ikuai va'e ipirupa, figo'y na'iporāvei, romā rogue, pindo ha'e maçā 'y voi. Yvyra yvy re ikuai va'e ha'e javi ipirupa. Ha'e va'e gui noīvei ma avakue ra'y kuery ovy'a aguā.

¹³ Sacerdote kuery, penhemonde ke ajukue vox a guigua py, ha'e pejae'o. Penhendu ratā, altar rupi pemba'epo va'e. Xeruete ropy rupi pendekuai va'e ha'e javi ke peju. Vox a guigua py penhemonde pytū mbukukue re, mba'eta Nhanderuete pegua oo py mba'emo aju ha'e mba'emo rykue ndogueruavei ramo.

¹⁴ Pavē pe pendu ukapa okaru e'ŷ re ikuai aguā, pejapo nhemboaty iky'a e'ŷ va'e, penoīmba yvatekueve ha'e nhandeyvy re ikuai va'e ha'e javi SENHOR Nhanderuete ropy oupa aguā. Ha'e gui pejapukai SENHOR pe.

¹⁵ Ha'e va'e ára mā ha'e rami ete 'rā! Mba'eta ovaẽ rai'i ma SENHOR ára.[‡] Mba'emo mbovaipaa rami 'rā ou Ipo'akapa va'e gui.

¹⁶ Pexaa py e'ŷ ri ty'y pe'u 'rā va'ekue okanhymba? Ha'e Nhanderuete ro gui voi ndoipe'aai 'rā ri ty'y javy'aa ha'e mby'a porā?

¹⁷ Mba'eta mba'emo ra'yīgue ma ipirupa oiny yvy guýry. Mba'emo moī porāaty ivaipa, mba'emo pemono'õ va'ekue moī porāaty ho'apa, pemono'õ 'rā va'ekue okanhymba ramo.

¹⁸ Nhuū nda'ipovei rā vaka kuery iporiaupa okuapy, penerymba kuery ha'e javi nda'evevei rei ikuai. Vexa'i kuery voi okanhymba oje'oivy.

[‡] ^{1:15} Apy “SENHOR ára” he'ia py ma raka'eve rā SENHOR nhombopaga aguā re ijayvu vy (Ezequiel 30.1-3; Joel 2.1-2; Amós 5.18-20; Obadias 15-17; Sofonias 1.7-18; 2 Pedro 3.10-13).

¹⁹ SENHOR, ndevy pe ajapukai, mba'eta nhuündy ikuai va'e ma tata oapypa, yvyra voi tata omotapyimba.

²⁰ Yy ipirupa rā ha'e javi mymba'i nhuündy rupigua onhe'ẽ rei okuapy ndevy pe ipoaẽ vy, ha'e nhuündy ikuai va'ekue tata omomba rire guive.

2

¹ Pemonhe'ẽ ke mimby guaxu Sião py, pemonhendu atã xevygua yvnty áry. SENHOR ára ou oiny ramo toryryipa yvy re ikuai va'e, mba'eta ovaẽ rai'i ma.

² Ha'e va'e ára ma pytumba 'rā, arai huumba rei 'rā. Yvnty áry ko'ẽ jekuaa ouvya rami avi peteĩ regua ou 'rā heta ha'e imbaraete ete va'e. Ha'e ramigua ma yma guive oiko va'ekue'ý teri, neĩ ha'e va'e rire voi ndoikovei 'rā guive, ikuai jevy-jevy va'e pe voi.

³ Ha'e kuery renonde oo oiny tata nhomombaarã, ha'e rā hakykue ma tataendy joapy va'e ou. Henonde ma Éden yvotyty rami yvy itui, ha'e rā hakykue ma yvy mbovaipaa. Avave rei ndoo jepeai 'rā.

⁴ Ha'e kuery jaexa rā kavaju rami ojekuaa. Kavaju joe opu'ãa rupigua rami ete onha oje'oivy.

⁵ Omoparágue rei jogueruvy karóxa kavaju regua rami. Yvnty áry rupi oaxa, ombopororo-roro 'rā jogueravy ka'aguy okai vy opororo-roroa rami, avakue heta vaipa ete joe opu'ã aguã katy oje'oi va'e rami avi.

⁶ Henonde ma yvy regua okyjepa, hova xiiguepa rei 'rā guive.

⁷ Ha'e kuery ma ipy'a guaxukueve rami 'rā onha. Avakue joguero'aa py ikuai va'e rami 'rā ojeupi tetã ikuai va'e kora áry. Peteĩ-teĩ oje'oi 'rā guape rupi ae, hyxy jogueravya gui ndojepé'ai 'rā.

⁸ Nanhomoaanha-anhai 'rā guive, peteĩ-teĩ ma oo aguã va'ekue rupi ae 'rā oo. Ndopyta rive-rivei 'rā tape rupi.

⁹ Oje'oi pojava 'rã tetã re opu'ã vy. Onha 'rã kora áry rupi, ojeupi 'rã oo ikuai va'e oipe'axe vy, imonda va'e rami 'rã oike janela rupi.

¹⁰ Ha'e kuery renonde yvy oryryi 'rã, yva omyí 'rã guive. Kuaray ha'e jaxy pytúmba 'rã. Jaxy-tata voi naendyvei 'rã.

¹¹ SENHOR ma guembiguai kuery heta raxa ikuai va'e renonde ijayvu ratã 'rã. Mba'eta ijayvua rupi ikuai va'e ma ipo'aka ete. Tá, SENHOR ára ma ipoyi ete 'rã, ivaikue raxa 'rã guive! Mava'e tu ogueropo'aka 'rã?

SENHOR nhomboaxya rupi ijayvuague

¹² Ha'e rami teĩ SENHOR aipoe'i:

— Aŷ'i ma voi pejeko rerova pendepy'a ha'e javi py, xevygua eterã. Pekaru e'ŷ re pendekuai, pejae'o ha'e penhemboaxy rei reve.

¹³ Pemondoro pendepy'a, pendeao e'ŷ — he'i. Ha'e rami vy pejeko rerova SENHOR peguarã. Mba'eta nhomboaxy kuaa ha'e poroayvu va'e oiko. Nda'ivai rive-rivei 'rã, nhanderayvu ete ha'e mba'emo vai gui ojejoko va'e.

¹⁴ Xapy'a rei ma nhandere SENHOR ojevy vy ndojapovei 'rã ojapo 'rã va'ekue, ha'e rami 'râgue py oeja 'rã nhanemoingo porãarã, ha'e ramo mba'emo aju ha'e mba'emo rykue teĩgue ju jajou aguã SENHOR Nhanderuete pe nhame'ẽ va'erã.

¹⁵ Ha'e nunga rupi mimby guaxu pemonhe'ẽ Sião py, peikuaa uka aguã pekaru e'ŷ re pendekuai ha'e nhemboaty iky'a e'ŷ va'e pejapo aguã.

¹⁶ Pemboaty ke heta va'e kuery ha'e javi, peiky'a'o ukapa guive onhemboaty va'e. Pemono'õ tujakueve, pemboaty pendera'y kue'iry, okambu'i va'e guive. Tou ava omenda ramo va'e, ta'yxy voi toẽ ouvy opy ja'o oĩague gui.

¹⁷ SENHOR rembiguai sacerdote kuery avi tojae'o templo rokẽ ha'e altar mbyte rupi ikuiai py. Tojerure po rami:

“ SENHOR, emomba ukaeme ndevyguakuery. Emboaxaeme ndevyguakuery ija'e e'ŷ va'e pe ojojai rei aguã, amboae regua kuery ‘Mamo tu Penderuete oĩ?’ he'i e'ŷ aguã”, te'i.

¹⁸ Ha'e rami rã SENHOR oexa uka oyvy re opena porãa, ojeupegua kuery omboaxy ju guive.

¹⁹ Ha'e rami vy ombovai vy aipoe'i ha'e kuery pe:

— Ne'exa, pendevy ambou 'rã mba'emo aju, uva rykue ha'e azeite. Ha'e va'e gui penerevyatã ju 'rã. Peẽ kuery noromboaxavei 'rã amboae regua kuery pe pendejajrei aguã.

²⁰ Ha'e rã kuaray ijapu'a'ia katygui xondaro kuery ouva'ekue ma peẽ kuerya gui aipe'apa ju 'rã mombyry. Petei vvy piru reia katy 'rã amondouka, tekaoa e'ŷa re. Henondeveguakuery amondouka 'rã kuaray ouakaty ye'ẽ oĩ va'e re, ha'e rã hakykueguakuery ma ye'ẽ kuaray oikeakaty 'rã. He'õgue ma heakuã vaikue 'rã, xepo'akaa rupiroepy rire — he'i.

²¹ Ha'e nunga rupi ndee yvy, ekyjeveeme. Ewy'a ha'e eĩ porã, SENHOR mba'emo porã ete ojapo ramo.

²² Ha'e mymba nhuñdy rupi pendekuai va'e, pekyjeveeme mba'eta nhuñ iporãmbaju 'rã tekaoa e'ŷa rupi, yvyraikuai va'e voi hi'apa ju 'rã, figoha'e uva voi hi'a porãmba 'rã.

²³ Peẽ Sião pygua kuery, pevy'a avi ke, perovy'a SENHOR Penderuete, mba'eta ombo'oky ju 'rã ha'evea rupi. Ha'ekue rupiaeju 'rã ombo'oky pema'etŷ jave, ha'e guihenhoimba jave guive.

²⁴ Mba'emo ra'yigue ykya ma tynyẽ ju 'rã trigo, ha'e mba'emo ryru ikuai va'e tynyemba 'rã uva rykue ha'e azeite.

²⁵ — Pendevy amboekovia 'rã ma'etŷ oaxava'ekue pytuku oguata va'e ho'upa va'ekue, ha'e tukumba'emo

mbovaipaa, tuku mba'emo ayaa ho'u va'ekue guive, mba'eta xevyguia xondaro kuery penderovai ambou va'ekue meme.

²⁶ Ha'e ramo pekaru porā ju 'rā penevyatāmba peve. Ha'e rami vy perovy'a 'rā SENHOR Penderuete rery, penderereko porā ramo. Ha'e va'e rire xevyguia kuery nomoxīmbaavei ma 'rā.

²⁷ Ha'e gui peikuua 'rā Israel kuery mbyte aña, ha'e xee SENHOR Penderuete aikoa, mba'eta ndoikoi amboae. Ha'e ramo xevyguia kuery nomoxīmbaavei ma 'rā raka'e rā peve.

Nhe'ẽ Ky'a E'ŷ ombou aguã re ijayvuague

²⁸ — Araka'eve rā avakue ha'e javi re anhoẽ 'rā imbouvy Xenhe'ẽ. Ha'e ramo pendera'y ha'e penderajy kuery ijayvu 'rā xegui. Kakuaakueve ma oexa ra'u 'rā mba'emo, ipyaukueve pe voi aexa uka 'rā.

²⁹ Tembiguai kuery avakue ha'e kunhague re voi ambou 'rā Xenhe'ẽ ha'e va'e ára.

³⁰ Yva ha'e yvy re aexa uka 'rā guive nhomondyipaarā: tuguy, tata ha'e hataxī.

³¹ SENHOR ára opa mba'e py nda'evei va'e ou ta ramo kuaray pytūmba 'rā, ha'e rā jaxy ma tuguy rami 'rā ojekuaa.

³² Ha'e ramo ha'e javi SENHOR rery rupi ojapukai va'e oo jepe 'rā. Sião yvyty re ha'e Jerusalém tetā py ikuai 'rā oo jepe va'e, SENHOR ijayvuague rami. Okuave va'e ha'e javi 'rā ikuai SENHOR oenoĩ va'ekue.*

* 2:32 Kova'e ayvu rupi ijayvua Pentecostes ára py (Atos 2.1-21, 38-40). Ha'e gui “SENHOR rery rupi ojapukai va'e oo jepe 'rā” he'ia ma Romanos 10.12-13 py omombe'u porāve avi.

Ngovaigua kuery Nhanderuete ombopaga aguã re ijayvuague

¹ — Ne'exa, ha'e va'e ára, ha'e va'e jave ma ambopyau ju 'rã Judá ha'e Jerusalém pygua kuery ikuai.

² Amono'õmba avi 'rã ha'e javi regua, ajapo 'rã Josafá vyvugua py oguejypa aguã rami. Ha'e py ma ambopagapa 'rã xevygua kuery káuxa, mba'eta xevygua Israel kuery ha'e kuery omoaõmba rire amboae regua ikuai rupi, xeyvy guive jomeme omboja'o-ja'o va'ekue.

³ Xevygua kuery re ha'e kuery oexa okuapy va'ekue oxortea. Avakue'i ha'e kuery omboekovia itavy rei va'e re, ha'e kunhague'i ma vinho oy'u va'erã re rive omboekovia va'ekue.

⁴ Tiro ha'e Sidom pygua, ha'e Filístia pygua ha'e javi, mba'e tu perekoxereve? Pepu'âxe ri ty'y xere? Ha'e ramo are'ý re xee ajapo 'rã pendevaia peneakã re ae ju ojeapa aguã rami.

⁵ Mba'eta peraa va'ekue xevygua prata ha'e ouro. Xemba'e iporãgue voi templo perekova'i rupi pemoi,

⁶ ha'e Judá ha'e Jerusalém pygua kuery ma peráta re pevendepa va'ekue grego kuery pe, oyvy gui mombyry ikuai aguã rami.

⁷ Ne'exa, xee arupa ju 'rã pemboaxaague gui. Ha'e vy pendevaia ajapo 'rã peneakã re ae ju ojeapa aguã rami.

⁸ Pendera'y kuery ha'e penderajy kuery ju amboaxa 'rã Judá regua kuery pe. Ha'e gui ha'e va'e kuery ju ome'ë 'rã sabeu kuery mombyry raxa ikuai va'e pe, SENHOR ae ijayvu rire.

⁹ — Peikuua uka povae nunga amboae regua kuery pe: “Pemombe'u joe pepu'â aguã, penoimba ipy'a guaxukueve. Ha'e ramo avakue joe opu'âa pygua tovaõmba, ha'e toẽmba ju oje'oivy.

¹⁰ Yvy karaïa perekva'e gui pejapo kyixerā, ha'e mba'emo 'ygue gui pejapo hu'yrā. Tove ikangy va'e 'Xee ma xembaraete va'e', te'i.

¹¹ Ijyvýry pendekuai va'e ha'e javi, pejapura pejuvy, penhemboatypa", peje.

Ha'e gui SENHOR, ha'e py embou avi ke ndeguigua ipy'a guaxukueve.

¹² — Topu'ã yvy regua kuery, Josafá yvyugua katy toupa. Mba'eta ha'e py ma xee aguapy 'rā ainy yvy regua kuery ambopaga aguã.

¹³ Pejopy pavē ke foice, mba'ety ijajupa ma ramo. Peju, pepyrō, mba'eta uva rykue oumbiriaty py tynyē ma hi'a, hyru ikuai va'e tynyēmba guive, ha'e kuery ojejavyague tuvixa ete rire.*

¹⁴ Ha'e gui heta-etave 'rā ou yvyugua ombopagaa aguã katy! Mba'eta SENHOR ára ovaẽ rai'i ma yvyugua nhombopaga aguã py.

¹⁵ Kuaray ha'e jaxy pytumba, jaxy-tata voi naendyvei.

¹⁶ Ha'e gui SENHOR ijayvu atã 'rā Sião gui, Jerusalém gui oendu uka 'rā. Ha'e ramo yva ha'e yvy oryryipa 'rā. Ha'e rami tei SENHOR oiko 'rā ixupegua kuery onhemi atyrā, Israel kuery pegua oo imbaraete va'e 'rā oiko.

¹⁷ — Ha'e ramo mae peikuaa 'rā xee SENHOR Penderuete aikoa, ha'e xevygua vytyty iky'a e'ŷ va'e Sião py aĩ va'ea. Ha'e gui Jerusalém tetã nda'iky'avei 'rā. Ha'e rupi ndoaxeavei ma 'rā amboae regua.

Israel kuery omoingo porã ju aguã re ijayvuague

¹⁸ — Ha'e va'e ára ma vytyty ikuai va'e gui oxyry 'rā oiny uva rykue. Yvy'ã áry gui oxyry avi 'rā kamby. Ha'e ramo Judá regua yakã ha'e javi tyguaxupa 'rā. Ha'e gui

* ^{3:13} Ha'e va'e jave py ha'e kuery oumbiri 'rā uva opyrō vy. Ha'e rami avi apy ijayvu Nhanderuete nhombopaga aguã re (Apocalipse 14.14-20).

Joel 3:19

10

Joel 3:21

SENHOR pegua oo gui yy oxyry ouvy vy omoakýmba 'rã
Sitim yvyugua ha'e javi rupi.

¹⁹ Ha'e rã Egito yvy ma ombovaipaa 'rã, Edom voi yvy piru
reia oejapa pyre 'rã opyta, Judá regua kuery jukaa rupi
ikuaiague re, oyvy re huguy omoẽ rire mba'e re'ý tei.

²⁰ Ha'e rã Judá yvy ma hekoa riae 'rã, Jerusalém tetã voi,
ta'y jevy-jevy ikuai peve.

²¹ Xee anhombopaga 'rã huguy omoẽague nambopagai
teriague re – he'i, mba'eta SENHOR oiko 'rã Sião py.

Nhanderuete ayvu iky'a e'ŷ va'e

New Testament in Guaraní, Mbyá

copyright © 2004 Wycliffe Bible Translators, Inc.

Language: Mbyá Guaraní (Guaraní, Mbyá)

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 853110565X

The New Testament

in Guaraní, Mbyá

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 29 Jan 2022 from source files dated 29 Jan
2022
3309fa3b-7590-5ae9-b829-5df4ddfbf957